



# Maritime Association in Bosnia and Herzegovina

Established in 2007, Reg. No. RU648/07 of the Ministry of Justice of Bosnia and Herzegovina

**Uzimajući u obzir** da je Bosna i Hercegovina suverena i međunarodno priznata država, koja je postala članica Ujedinjenih nacija 22. maja 1992. godine, isti dan kada i Republika Hrvatska, te da su obje samostalnost stekle disolucijom Socijalističke Federativne Republike Jugoslavije (ex Jugoslavija).

## **Pozivajući se na:**

- Član 1. Ustava Bosne i Hercegovine (Aneks 4 Dejtonskog mirovnog sporazuma, potpisan 14. decembar 1995. godine) kojim je utvrđeno da „Republika Bosna i Hercegovina, čije je zvanično ime od sada “Bosna i Hercegovina”, nastavlja svoje pravno postojanje po međunarodnom pravu kao država, sa unutrašnjom strukturom modificiranom ovim Ustavom, i sa postojećim međunarodno priznatim granicama.“,
- Zaključak Predsjedništva Bosne i Hercegovine broj 01-011-3110-1/07 od 17.10.2007. godine, kojim je naglašeno da je Bosna i Hercegovina (BiH) protiv izgradnje Pelješkog mosta do rješavanja otvorenih pitanja vezanih za identifikaciju granične crte na moru između dvije države,
- Zaključak Predsjedništva Bosne i Hercegovine broj 01-011-3138-19/09 od 23.4.2009. godine, u kojem je naglašena potreba poštivanja Konvencije Ujedinjenih naroda o pravu mora, 1982 (UNCLOS) i da se u skladu s tim rješavaju problemi dvije države i
- Deklaraciju Predstvičkog doma Parlamentarne skupštine Bosne i Hercegovine od 13.9.2017. godine (Sl. glasnik 68/17), kojom je potvrđeno da je BiH obalna država i da je članica UNCLOS, te da se obustave sve aktivnosti na izgradnji Pelješkog mosta i da se pristupi sporazumnom rješavanju svih otvorenih pitanja na moru uz poštivanje dobrosusjedskih odnosa i međunarodnog prava.

**Imajući u vidu** činjenicu da Republika Hrvatska (Hrvatska) nije uvažila interese BiH, te da je kao članica Evropske unije (EU) finansijski podržana od strane Evropske komisije (EC) sa 357 mil Euro za izgradnju Pelješkog mosta, kao i 63 mil Euro za pristupne ceste od strane Evropske investicijske banke (EIB).

**Uzimajući u obzir** navedeno i pozivajući se na odredbe Statuta Pomorskog društva u Bosni i Hercegovini (Pomorsko društvo), prihvaćenog od strane Ministarstva pravde Bosne i Hercegovine, Skupština Pomorskog društva, na prijedlog Upravnog odbora i Predsjednika Pomorskog društva, na današnji dan donosi:

## **DEKLARACIJU**

### **o zaštiti suvereniteta i teritorijalnog integriteta Bosne i Hercegovine na Jadranskom moru**

#### **Kojom javno potvrđujemo da je:**

- BiH samostalna, suverena i nedjeljiva država, međunarodno priznata sa višestoljetnim kontinuitetom postojanja,
- BiH obalna država i da ima obalu kopna dužu više od 24 km i morsku površinu veću od 14 km<sup>2</sup>, a što joj pruža izuzetne mogućnosti ekonomskog i društvenog razvoja i
- BiH članica UNCLOS-a od januara 1994. godine i Konvencije o teritorijalnom moru i vanjskom pojasu (Ženeva 1958) od septembra 1993. godine.

#### **Nadalje, potvrđujemo da je Hrvatska:**

- Usvajajući Pomorski zakonik 1994. godine i 2004. godine proglasila svoj državni suverenitet na pomorskoj teritoriji i obali kopna niskih voda BiH, a što korespondira sa namjerama i ciljevima udruženog zločinačkog pothvata i agresije na BiH, kako je navedeno u presudi Međunarodnog krivičnog suda za bivšu Jugoslaviju (*Case No.: IT-04-74-A*, 29 November 2017). Na taj način je

odbacila historijsku granicu dvije države na Jadranskom moru, te grubo ugrozila suverenitet i teritorijalni integritet BiH,

- Da je samovoljno preuzela i „naslijedila“ polazne ravne crte za razgraničenje teritorijalnog mora od ex Jugoslavija, bez uvažavanja suvereniteta i teritorijalnog integriteta BiH, poštivanja javnog međunarodnog prava, UNCLOS (članica od maja 1995.), Konvencije o teritorijalnom moru i vanjskom pojasu (članica od augusta 1992), Proklamovane demokratske i sigurnosne principe Evropske unije, Međunarodne norme o ljudskim pravima, Dejtonskog mirovnog sporazuma (1995) i Ugovora o državnoj granici između Republike Hrvatske i Bosne i Hercegovine (1999) i
- Pomorskim zakonikom oduzela BiH stečeno pravo na slobodan pristup otvorenom moru koji je BiH imala kao jedna od šest republika ex Jugoslavije i koja je kao i Hrvatska naslijedila članstvo ex Jugoslavije u UNCLOS (1982) i Konvenciji o teritorijalnom moru i vanjskom pojasu (1958).

**Shodno navedenom, zahtijevamo da:**

- Vlasti Hrvatske usvoje izmjename i dopune važećeg Pomorskog zakonika Hrvatske (NN 181/04, 76/07, 146/08, 61/11, 56/13, 26/15) u kojem bi se otklonile sve, još uvijek važeće odredbe kojima se ugrožava suverenitet i teritorijalni integritet BiH, te uskladi sa UNCLOS (1982), Konvencijom o teritorijalnom moru i vanjskom pojasu (1958) i EU *acquis communautaire*.
- Vlasti BiH da preuzmu potrebne aktivnosti kako bi zaštitili suverenitet i teritorijalni integritet BiH na Jadranskom moru i općenito.
- Evropska komisija odmah prestane sa svakom materijalnom i moralnom podrškom Hrvatskoj u ostvarenju njenih namjera i ciljeva, te da se aktivno uključi u rješavanje navednih problema koje je prouzročila članica EU.

**Ovim rezerviramo i ostvarujemo sva prava Bosne i Hercegovine na Jadransko more prema Konvenciji UN-a o moru od 1982. godine, Ženevskoj konvenciji o teritorijalnom moru i i vanjskom pojasu od 1958. godine i svim ostalim izvorima međunarodnog javnog prava.**

Sarajevo, 18. decembar 2020. godine

Reg. No. 22/IB/20